

阿毘達磨大毘婆沙論卷第一百三十二

五百大阿羅漢等造
三藏法師玄奘奉 詔譯

大種蘊第五中緣納息第二之二

藍字部分：《發智論卷十三》釋論範圍

問：若堅、不堅物，轉相作者，諸法云何不捨自相？云何相作？如水性軟，至冬凝結。斧斫猶難，金等性堅。若置炎鑪，便銷如水。如是等，豈非諸法捨自相耶？

答：非諸堅物轉作不堅，亦非不堅轉成堅物。然！堅、不堅法，住未來世。若遇堅緣，則不堅法滅，堅法續生。遇不堅緣，則堅法滅，不堅續生。餘亦如是，故無諸法，捨自相過。

問：大種等聚中，有間隙不？設爾！何失？二俱有過。若有間隙，寧不相離；間隙若無，何不成一？

答：有說：此有間隙，空界於中，相雜住故。

問：若爾！云何名不相離？

答：空界於中，能自隱匿，令於諸物，見不相離。如叢中女，自蔽其身。

有說：此無間隙，展轉相逼，無間住故。

問：若爾！云何不成一耶？

答：雖無間隙，而不成一。如蘊、處、界，三世等中，間隙雖無，而不成一，彼亦如是。

又大種等自體、作用，各各異故，不可成一。

問：諸極微互相觸不？設爾！何失？二俱有過。若相觸者，寧不成一，或成有分。若不相觸，擊時應散，或應無聲。

答：應作是說：極微互不相觸。若觸，則應或遍、或分。

遍觸，則有成一體過。

分觸，則有成有分失。然！諸極微，更無細分。

問：聚色相擊，寧不散耶？

答：風界攝持，故令不散。

問：豈不風界，能飄散耶？

答：有能飄散，如壞劫時；有能攝持，如成劫時。

問：若不觸者，即相擊時，云何發聲？

答：即由此因，故使聲發。若相觸者，如何發聲？謂：諸極微體相觸者。手等相和，體應相糅。中無間隙，如何發聲？

尊者世友作如是說：若諸極微互相觸者，彼應得住，至後剎那。

大德說言：實不相觸。但於合集無間生中，隨世俗諦假名相觸。

問：諸是觸物，為是觸為因，故生。為非觸為因，故生；諸非觸物，為非觸為因，故生。為是觸為因，故生？

答：有時是觸為因，生於非觸。謂：和合物，正離散時。

有時非觸為因，生於是觸。謂：離散物，正和合時。

有時是觸為因，生於是觸。謂：和合物，復和合時。

有時非觸為因，生於非觸。謂：向遊塵同類相續。

問：極微當言可見、不可見耶？

答：尊者妙音作如是說：極微當言可見，慧眼境故。

阿毘達磨諸論師言：極微當言不可見，非肉、天眼所能見故。此中不依慧眼作問，以於諸法無差別故。

頗有過去大種造過去色耶？…乃至廣說。

問：何故作此論？

答：欲止他義，顯己義故。

謂有餘部，撥～無去、來，說現在世是無為法。

欲止彼意，顯～有去、來，亦明現在是有為法，廣如前說。

復有外道，依～世現喻，執有為法，後為前因。彼作是言：「現見泉水，前為後逼，令其涌流。如是諸法，由未來法逼令現在，復由現法逼令過去，故有為法，後為前因。」

今欲止彼外道所說，顯～有為法前能生後，非後前因。不爾！便違內、外緣起。謂：世父、母應從子生，眼、色應從眼識而起，應無明等從行等生，種等應從芽等而起，先受苦、樂報-後造善、惡業，先得菩提-然後修行，既未作而得-應已作而失。若爾！便無得解脫-理。

又欲遮說～大種造色，必同世者。顯～有異世。由此因緣，故作斯論。

諸有對所造色，及隨心轉無表色，隨在何世，即彼世大種造。

謂：過去造過去，現在造現在，未來造未來。

若表所起諸無表色，復有三類，造時不等。

謂：初剎那，如有對等，各為同世大種所造。

第二剎那，若在過、現，俱為過去大種所造。

若在未來，通為現、未大種所造。

後諸剎那，過、現，如前。

若在未來，通為三世大種所造。

所以者何？

諸有依表，發起律儀及不律儀，非二無表。

初剎那頃-表、無表色，與此及餘能造大種，現在俱滅。

滅至第二剎那以後，表及大種俱在過去。

諸無表色，有在過去、有在未來、有在現在。是謂此處略毘婆沙。

頗有過去大種造過去色耶？答：有。

謂：過去一切有對所造色，隨心轉無表。表所起無表，唯為過去大種所造。

頗有過去大種造未來色耶？答：有。

謂：有未來-表所起無表，唯為過去大種所造。

頗有過去大種造現在色耶？答：有。

謂：有現在-表所起無表，唯為過去大種所造。

頗有未來大種造未來色耶？答：有。

謂：未來一切有對所造色，隨心轉無表，及有未來表所起無表，唯為未來大種所造。

頗有未來大種造過去、現在色耶？答：無。

謂：無果先因後-理故。

頗有現在大種造現在色耶？答：有。

謂：現在一切有對所造色，隨心轉無表，及有現在表所起無表，唯為現在大種所造。

頗有現在大種造過去色耶？答：無。

謂：無果先因後-理故。

頗有現在大種造未來色耶？答：有。

謂：有未來-表所起無表，唯為現在大種所造。

※諸隨心轉無表，是等流，無執受有情數攝；彼能造大種，是長養，無執受有情數攝。

※諸表所起無表，是等流，無執受有情數攝；彼能造大種，是等流，有執受有情數攝。

諸隨心轉無表，有二種：一、靜慮律儀所攝。二、無漏律儀所攝。

此各有七：謂：離害生命…乃至離雜穢語。靜慮律儀所攝七種，共一四大種所造，無漏律儀七種亦爾。

諸表所起無表，有三種：一、律儀所攝。二、不律儀所攝。三、非律儀非不律儀所攝。

★律儀所攝，復有七種：謂：離害生命…乃至離雜穢語。如是七種各一-四大種所造。

離害生命，復有二種：謂：表、無表，此二各一-四大種所造。

有餘師說：此表、無表，共一-四大種所造。

故彼問言：頗有一-四大種，造二處色耶？

答：有。謂：色處、法處及聲處、法處，尊者妙音亦作是說。

阿毘達磨諸論師言：彼說非理，不可一-四大種造麤、細二果。是故如前所說者好，如離害生命，表與無表，各一-四大種所造，如是…乃至離雜穢語亦爾。

★不律儀所攝，亦有七種：調：害生命…乃至雜穢語，非二所攝，有二-七種。調：害生命、離害生命…乃至雜穢語、離雜穢語。此諸七種，各一-四大種所造。如是諸七，各復有二，調：表、無表，此亦各一-四大種造。
餘師說等，如前應知。

若成就過去大種，彼過去所造色耶？…乃至廣說。

問：何故作此論？

答：欲止撥～無去、來二世，及說成就、不成就，體非實有者。

意顯～去、來世，及成就等，是實有法，故作此論。

若成就過去大種，彼（成就）過去所造色耶？

答：無成就過去大種，有成就過去所造色。謂：諸聖者住胎藏中。若生欲界，住律儀、若住不律儀、若住非律儀非不律儀，先有身、語表-不失。若生色界。若諸學者，生無色界。

問：亦有學者，生無色界，不成就過去所造色。調：彼先在欲、色界時，未起、未滅諸無漏道，命終生無色界，都不成就過去所造色。如何乃說：「若諸學者，生無色界，成就過去所造色」耶？

答：依成就者，作如是說：調有學者，先欲、色界，已起、已滅諸無漏道，彼成就過去所造色故。

有說：彼在欲、色界時，必已起、滅諸無漏道。如勝進道必起現前，無有住果而命終故。

若成就過去大種，彼（成就）未來大種耶？

答：無成就過去、未來大種。

問：何故無成就過去、未來大種耶？

答：由彼大種，但有爾所成就勢力，剎那現前，則有成就。

已滅、未現，無成就者。調：諸大種與成就得，必同一世，今時、彼得，不現在前，故不成就。

有說：大種習氣不堅，故無成就去、來世者，以是羸劣，無記性故。調：善、惡等習氣堅牢，故有成就去、來世者，劣無記法，則不如是。如暫執持極香花物，雖加洗拭，習氣猶隨。非如執持餘木石等，手纔放捨，此氣便無。

有說：若成就去、來世大種者，則一趣成就五趣大種。如是一身即五趣身，是則趣壞，所依亦壞。

欲令無如是過，是故大種，不成就去、來。

問：如生一趣，成就五趣諸業煩惱，而非趣壞，此亦應然？

答：以異熟果，故說諸趣差別，不以業煩惱故。然諸大種或有是異熟果者，則有趣壞及所依壞-過失，故彼非難。

若成就過去大種，彼（成就）未來所造色耶？

答：無成就過去大種，有成就未來所造色。謂：諸聖者，住胎藏中。若生欲

界，得色界善心。若生色界。若諸聖者，生無色界。

以彼定，成就未來所造色故。

若成就過去大種，彼（成就）現在大種耶？

答：無成就過去大種，有成就現在大種。謂：生欲、色界。

無有生欲、色界，不成就大種故。

若成就過去大種，彼（成就）現在所造色耶？

答：無成就過去大種，有成就現在所造色。謂：生欲、色界。

無有生欲、色界，不成就所造色故。

若成就過去所造色，彼（成就）未來大種耶？

答：無成就未來大種，有成就過去所造色。謂：諸聖者，住胎藏中，若生欲界-住律儀、若住不律儀、若住非律儀非不律儀，先有身、語表-不失。

若生色界。若諸學者，生無色界。

若成就過去所造色，彼（成就）未來所造色耶？

答：應作四句。

- ①有成就過去所造色，非未來所造色。謂：生欲界，住律儀，不得色界善心。若住不律儀、若住非律儀非不律儀，先有身、語表-不失。
- ②有成就未來所造色，非過去所造色。謂：阿羅漢，生無色界。
- ③有成就過去所造色，亦未來所造色。謂：諸聖者，住胎藏中。若生欲界，得色界善心。若生色界。若諸學者，生無色界。
- ④有非成就過去所造色，亦非未來所造色。謂：處卵毼。若諸異生，住胎藏中。若生欲界，住非律儀非不律儀，先無身、語表，設有-而失。若諸異生，生無色界。

若成就過去所造色，彼（成就）現在大種耶？

答：應作四句。

- ①有成就過去所造色，非現在大種。謂：諸學者，生無色界。
- ②有成就現在大種，非過去所造色。謂：處卵毼。若諸異生，住胎藏中。若生欲界，住非律儀非不律儀，先無身、語表，設有-而失。
- ③有成就過去所造色，亦現在大種。謂：諸聖者，住胎藏中。若生欲界，住律儀、若住不律儀、若住非律儀非不律儀，先有身、語表-不失。若生色界。
- ④有非成就過去所造色，亦非現在大種。謂：阿羅漢。若諸異生，生無色界。

若成就過去所造色，彼（成就）現在所造色耶？

答：應作四句。

- ①有成就過去所造色，非現在所造色。謂：諸學者，生無色界。
- ②有成就現在所造色，非過去所造色。謂：處卵毼。若諸異生，住胎藏中。若生欲界，住非律儀非不律儀，先無身、語表，設有-而失。

- ③有成就過去所造色，亦現在所造色。謂：諸聖者，住胎藏中。若生欲界，住律儀、若住不律儀、若住非律儀非不律儀，先有身、語表-不失。若生色界。
- ④有非成就過去所造色，亦非現在所造色。謂：阿羅漢。若諸異生，生無色界，過去已捨故，現在無色身故。

若成就未來大種，彼（成就）未來所造色耶？

答：無成就未來大種，有成就未來所造色。謂：諸聖者，住胎藏中。若生欲界，得色界善心。若生色界。若諸聖者，生無色界。

若成就未來大種，彼（成就）現在大種耶？

答：無成就未來大種，有成就現在大種。謂：生欲、色界。
無有生欲、色界，不成就大種故。

若成就未來大種，彼（成就）現在所造色耶？

答：無成就未來大種，有成就現在所造色。謂：生欲、色界。
無有生欲、色界，不成就現在所造色故。

若成就未來所造色，彼（成就）現在大種耶？

答：應作四句。

- ①有成就未來所造色，非現在大種。謂：諸聖者，生無色界。
- ②有成就現在大種，非未來所造色。謂：處卵毼。若諸異生，住胎藏中。若生欲界，不得色界善心。
- ③有成就未來所造色，亦現在大種。謂：諸聖者，住胎藏中。若生欲界，得色界善心。若生色界。
- ④有非成就未來所造色，亦非現在大種。謂：諸異生，生無色界。

若成就未來所造色，彼（成就）現在所造色耶？

答：應作四句。

- ①有成就未來所造色，非現在所造色。謂：諸聖者，生無色界。
- ②有成就現在所造色，非未來所造色。謂：處卵毼。若諸異生，住胎藏中。若生欲界，不得色界善心。
- ③有成就未來所造色，亦現在所造色。謂：諸聖者，住胎藏中。若生欲界，得色界善心。若生色界。
- ④有非成就未來所造色，亦非現在所造色。謂：諸異生，生無色界。

若成就現在大種，彼（成就）現在所造色耶？答：如是。

設成就現在所造色，彼（成就）現在大種耶？答：如是。

以非現在大種無果故，亦非現在所造色無因故。

過去大種與過去大種，為幾緣？答：因、增上。

- 因者→二因。謂：俱有、同類。俱生互相望，為俱有因；前生與後生，為同類因。

•增上者→謂：不礙生及唯無障。

過去大種與過去所造色，為幾緣？答：因、增上。

因者→五因。謂：生因、依因、立因、持因、養因。

增上者→如前說。

過去所造色與過去所造色，為幾緣？答：因、增上。

因者→三因。謂：俱有、同類、異熟；增上者→如前說。

過去所造色與過去大種，為幾緣？答：因、增上。

因者→一因。謂：異熟因；增上者→如前說。

過去大種與未來大種，為幾緣？答：因、增上。

因者→一因。謂：同類因；增上者→如前說。

未來大種與未來大種，為幾緣？答：因、增上。

因者→一因。謂：俱有因；增上者→如前說。

未來大種與過去大種，為幾緣？答：一，增上。增上義，如前說。

過去大種與未來所造色，為幾緣？答：因、增上。

因者→五因。謂：生等五；增上者→如前說。

未來所造色與未來所造色，為幾緣？答：因、增上。

因者→二因。謂：俱有因、異熟因；增上者→如前說。

未來所造色與過去大種，為幾緣？答：一，增上。增上義，如前說。

過去大種與現在大種，為幾緣？答：因、增上。

因者→一因。謂：同類因；增上者→如前說。

現在大種與現在大種，為幾緣？答：因、增上。

因者→有說：此中依剎那現在為論，故唯一因。謂：俱有因。

有說：此中通依剎那分位，一生現在為論故。有二因。謂：俱有、同類。

增上者→如前說。

現在大種與過去大種，為幾緣？答：一，增上。增上義，如前說。

過去大種與現在所造色，為幾緣？答：因、增上。

因者→五因。生等五；增上者→如前說。

現在所造色與現在所造色，為幾緣？答：因、增上。

因者→有說：此中依剎那現在為論，故唯一因。謂：俱有因。

有說：此中通依剎那分位，一生現在為論故。有三因：謂：俱有、同類、異熟。

增上者→如前說。

現在所造色與過去大種，為幾緣？答：一，增上。增上義，如前說。

過去所造色與未來大種，為幾緣？答：因、增上。

因者→一因。謂：異熟因；增上者→如前說

未來大種與過去所造色，為幾緣？答：一，增上。增上義，如前說。

過去所造色與未來所造色，為幾緣？答：因、增上。

因者→二因。謂：同類、異熟；增上者→如前說。

未來所造色與過去所造色，為幾緣？答：一，增上。增上義，如前說。

過去所造色與現在大種，為幾緣？答：因、增上。

因者→一因。謂：異熟因；增上者→如前說。

現在大種與過去所造色，為幾緣？答：一，增上。增上義，如前說。

過去所造色與現在所造色，為幾緣？答：因、增上。

因者→二因。謂：同類、異熟；增上者→如前說。

現在所造色與過去所造色，為幾緣？答：一，增上。增上義，如前說。

未來大種與未來所造色，為幾緣？答：因、增上。

因者→五因。即生等五；增上者→如前說。

未來所造色與未來大種，為幾緣？答：因、增上。

因者→一因。謂：異熟因；增上者→如前說。

未來大種與現在大種，為幾緣？答：一，增上。增上義，如前說。

現在大種與未來大種，為幾緣？答：因、增上。

因者→一因。謂：同類因；增上者→如前說。

未來大種與現在所造色，為幾緣？答：一，增上。增上義，如前說。

現在所造色與未來大種，為幾緣？答：因、增上。

因者→一因。謂：異熟因；增上者→如前說。

未來所造色與現在大種，為幾緣？答：一，增上。增上義，如前說。

現在大種與未來所造色，為幾緣？答：因、增上。

因者→五因。謂：生等五；增上者→如前說。

未來所造色與現在所造色，為幾緣？答：一，增上。增上義，如前說。

現在所造色與未來所造色，為幾緣？答：因、增上。

因者→二因。謂：同類、異熟；增上者→如前說

現在大種與現在所造色，為幾緣？答：因、增上。

因者→五因。謂：生等五；增上者→如前說。

現在所造色與現在大種，為幾緣？答：因。增上。

因者→一因。謂：異熟因；增上者→如前說。

諸說此中，依剎那分位，一生現在為論者，則符此答。

諸說此中，但依剎那現在為論者，則應答言：「但一增上。」便與本論答不相應。

若成就欲界繫大種，彼（成就）欲界繫所造色耶？答：如是。

設成就欲界繫所造色，彼（成就）欲界繫大種耶？答：如是。

以無成就欲界繫大種，而非果故；亦無成就欲界繫所造色，而非因故。

若成就欲界繫大種，彼（成就）色界繫大種耶？

答：應作四句。

- ①有成就欲界繫大種，非色界繫大種。謂：生欲界，色界大種不現在前。
- ②有成就色界繫大種，非欲界繫大種。謂：生色界，不作欲界化，不發欲界語。
- ③有成就欲界繫大種，亦色界繫大種。謂：生欲界，色界大種現在前。若生色界，作欲界化，發欲界語。
- ④有非成就欲界繫大種，亦非色界繫大種。謂：生無色界。

若成就欲界繫大種，彼（成就）色界繫所造色耶？

答：應作四句。

- ①有成就欲界繫大種，非色界繫所造色。謂：生欲界，不得色界善心。
- ②有成就色界繫所造色，非欲界繫大種。謂：生色界，不作欲界化，不發欲界語。
- ③有成就欲界繫大種，亦色界繫所造色。謂：生欲界，得色界善心；若生色界，作欲界化，發欲界語。
- ④有非成就欲界繫大種，亦非色界繫所造色。謂：生無色界。

若成就欲界繫所造色，彼（成就）色界繫大種耶？

答：應作四句。

- ①有成就欲界繫所造色，非色界繫大種。謂：生欲界，色界大種不現在前。
- ②有成就色界繫大種，非欲界繫所造色。謂：生色界，不作欲界化，不發欲界語。
- ③有成就欲界繫所造色，亦色界繫大種。謂：生欲界，色界大種現在前；若生色界，作欲界化，發欲界語。
- ④有非成就欲界所造色，亦非色界大種。謂：生無色界。

若成就欲界繫所造色，彼（成就）色界繫所造色耶？

答：應作四句。

- ①有成就欲界繫所造色，非色界繫所造色。謂：生欲界，不得色界善心。
- ②有成就色界繫所造色，非欲界繫所造色。謂：生色界，不作欲界化，不發欲界語。
- ③有成就欲界繫所造色，亦色界繫所造色。謂：生欲界，得色界善心；若生色界，作欲界化，發欲界語。
- ④有非成就欲界繫所造色，亦非色界繫所造色。謂：生無色界。

若成就色界繫大種，彼（成就）色界繫所造色耶？

答：諸成就色界繫大種，彼定成就色界繫所造色；有成就色界繫所造色，非色界繫大種。謂：生欲界，得色界善心，色界大種不現在前。

問：生欲界者，住色界何等心，令彼大種現在前？為一向住善？為三種耶？設爾！何失？俱見其過。

若一向住善心者，《施設論》說當云何通？如說：「住此無聞異生，由起色貪纏所纏故，五蘊色有於現法中，以取為緣，趣當來有。」

若住三種心者，善心可爾，有隨轉色為彼果故；染及無記為有何果？令彼現前。

有作是說：唯住善心。

問：《施設論》說，當云何通？

答：彼說身中所增長色。

問：若爾！彼說復云何通？如說：「住此無聞異生，由起無色貪纏所纏，故四蘊無色。有於現法中，以取為緣，趣當來有。」彼身亦有所增長色，何故不說？

有作是說：應說而不說者，當知此義有餘。

有說：起彼界纏時，無增長色，是以不說。

復有說者：住三種心。

問：善心可爾，有隨轉果故，餘二有何果，令彼現前？

答：彼生欲界者，起色界善心時，由隨轉色故，令彼現前。

起染污心時，由有彼地空界色，在此身中相雜住故，令彼現前。

起無記心時，由有彼地化色，令彼現前故，住三種心，皆能起彼地大種。

